



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

08 Juñu 2016

Komunikadu Imprensa

Parlamentu Nasionál

**Parlamentu Nasionál Anunsia no Admite Alterasaun ba Projeitu Alterasaun ba Lei
Pensaun Mensál Vitalisia ba Eis-deputadu sira ba Komisaun Eventuál**

Iha loron 6 Juñu tinan 2016, Parlamentu Nasionál (PN) liuhosi reuniaun plenária anúnsiu no admite hodi baixa ba Komisaun Eventuál atu halo apresiasaun ba Projeitu Lei n.º 5/III (2ª) kona-ba Primeira Alterasaun ba Lei Pensaun Mensál Vitalisia ba Eis-deputadu sira (Lei n.º 1/2007, de 18 Janeiro), Alterasaun ba Lei n.º 5/2004, de 5 de Maio, kona-ba Estatutu Deputadu, nune'e mós Projeto de Lei n.º 9/III (4ª) kona-ba Alterasaun ba Lei n.º 7/2007, de 25 de Julho kona-ba Estatutu ba Titulár Órgaun Soberania sira. Projeitu alterasaun ne'e apresenta hosi bankada Fretilin no PD.

JSMP kongratula sensibilidade lideransa meza Parlamentu Nasionál foun ne'ebé manifesta sentidu responsabilidade institusionál no kapasidade atu kaer aspirasaun no ezijsia popular ne'ebé durante lakon leet deit iha Parlamentu Nasionál.

Iha audénsia sira ne'ebé JSMP halo ho deputadu sira atu fó prioridade no importansia ba alterasaun ba lei hirak ne'e. Durante tinan barak elementu sosiedade hotu-hotu, igreja, akadémiku, to'o Prezidenté Repúblika no povu baibain sira ejize PN atu altera lei hirak ne'e, maibé lakonsege realiza tanba PN lakon sentidu sosial atu kapta ejijsia hirak ne'e. Insiativa ne'e sei lori esperansa foun atu hatan ba ezijsia povu nia durante ne'e.

“Ne'e nudar pasu importante tebes ne'ebé durante ne'e ema hotu hein atu PN bele halo buat ruma hodi muda lei sira ne'e no espera katak prosesu ne'e bele sai hanesan lembransa no istoria lejislative ida-ne'e, deputadu sira iha lejislatura datoluk hosik hela ba PN,” dehan Luis de Oliveira Sampaio, Diretor Ezekutivu JSMP.

JSMP rekomenda ba Komisaun Eventuál atu nakloke no fó oportunidade ba entidades relevante sira hotu hodi fó sira nia opiniaun no analiza klean ba esbosu projeitu alterasaun ba lei tolu ne'e. JSMP mós husu Komisaun Eventuál atu explora no buka referénsia alternativa hosi esperensia no prátika hosi nasaun seluk ne'ebé relevante ho Timor-Leste nia kontestu.

Atu hatene kle'an informasaun kona-ba JSMP nia analiza, komentariu no observasaun krítiku no diskusaun grupu ho sosiedade sívil sira ne'ebé JSMP organiza iha 28 Setembru 2015, kona-ba Estatutu ba Titulár Órgaun Soberania no Lei Pensaun Mensál Vitalisia ba Eis-deputadu sira, , bele asesu iha website JSMP. <http://jsmp-pop.page.tl/Analiza-Lei.htm>

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPTl